

四庫全書

集部

欽定四庫全書

集部
歸田稿卷二

詳校官中書_臣瞿_照

中書_臣劉源溥覆勘

總校官進士_臣繆_琪

校對官檢討_臣李學錦

謄錄監生_臣林紹龍

欽定四庫全書

集部六

歸田稿

別集類五

明

提要

臣等謹案歸田稿八卷明謝遷撰遷字子喬
餘姚人成化乙未賜進士第一授修撰歷官
戶部尚書謹身殿大學士贈太傅謚文正事
蹟具明史本傳遷之在內閣也與劉健李東
陽同心輔政史稱其秉節直諒見事明敏天

下稱為賢相庶乎能以道事君者其文集全
稿以嘉靖中倭亂被燬此乃其致仕以後及
再召時所作自題曰歸田稿以授其子至者
國朝康熙中其七世孫大名府同知鍾和復加
釐輯梓而傳之集中奏疏類多晚年陳謝之
作而在朝時嘉謨謹論均已亡佚無存即以
史所稱請罷選妃嬪禁約內官諸疏卓卓最
著者而亦不在其間則其散失者當復不少

然遷當歸里以後正劉瑾焦芳等挾怨修郤
日在危疑震撼之中而所作詩文大抵詞旨
和平惟惓惓焉托江湖魏闕之思以冀其君
之一悟老臣憂國之心實有流溢於不自覺
者讀者知其忠悃所存固毋庸以文字之工
拙論矣乾隆四十四年七月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

歸田稿卷一

明 謝遷 撰

奏疏類

謝存問疏

致仕少傅兼太子太傅禮部尚書武英殿大學士臣謝
遷謹奏為謝恩事臣遷伏蒙聖恩賜勅遣官存問且加
賜羊酒輿隸官廩臣遷誠惶誠恐稽首頓首拜受竊念

臣本菲才誤蒙孝宗敬皇帝知遇之隆顧託之重欲圖報稱勉竭駑庸不自知其力之不足既而格心無術輔導罔効引身退避杜門省愆俯仰懷慚罪責難逭分與草木同腐幸而溝壑未填茲者伏遇皇帝陛下天啓聖明嗣承大統一新萬化雷動風行凡在疲困之徒咸遂更生之願如臣衰朽特軫聖慈不加負國之誅重錫優老之典寵命下及慚懼交并顧茲垂暮之年諒無圖報之日惟有一言獻納庶幾少効涓埃臣聞傳說之告高

宗曰學于古訓乃有獲又曰監于先王成憲其永無愆
此誠告君之至言為君之要道也自今觀之所謂古訓
者二帝三王之典謨訓誥及諸經史之所載者是已成
憲者聖祖神宗之典章法度凡今諸司所職者是已仰
惟陛下聖性之睿哲固出于生知而聖德之成就必資
乎問學經筵儒臣分直進講所以薰陶涵養者在是燕
閒之時尤博覽羣籍以廣見聞苟有疑義難明即召勸
講之臣面賜質問務求通解戒一暴十寒之失積日就

月將之功則聖學緝熙而聖德之成可以追踪古昔帝王之盛近代不足言矣我朝祖宗之法斟酌古今之宜諸司而能恪守萬世可以常行奈何世遠人亡政久弊積漸失其初者有矣聽覽之際謂宜申飭百司講求成憲苟有窒礙難行即召執政之臣面加商確務合舊制究詰舛訛之端振革廢弛之弊則聖政有恒而聖治之成可以紹休聖祖神宗之盛垂裕于無疆矣夫一日萬幾固未易縷陳而一心萬化惟在于知要臣故特舉君

道之至要以裨聰明之萬一其他軍民利病政治缺失
陛下明詔許諸人直言無隱況以言為職者林立于廷
必能為陛下次第陳之惟望留神省覽不以踈淺而或
遺不以拂逆而見拒則宗社幸甚生靈幸甚臣受恩深
重不勝瞻仰懇切之至為此具本專令長男謝正齋抱
赴京謹具奏聞伏候勅旨

謝時加存問疏

致仕少傅兼太子太傅禮部尚書武英殿大學士臣謝

遷謹奏為謝恩事臣先蒙聖恩賜勅遣官存問具本令
長男正齋抱赴京謝恩荷蒙聖慈溫旨慰諭褒獎過情
且錄蔭臣男正為中書舍人隨該正以母徐氏病故在
家具本乞恩終制復蒙聖恩欽賜臣妻徐氏葬祭并齎
糧麻布之賻近又該都御史何天衢奏為優老乞言以
裨聖政事濫及臣名節該欽奉聖旨還著有司時加存
問陛下卹臣之私既及臣子又及臣妻而于臣之微軀
尤荷軫念猥厪告存仰惟天地涵育之仁不遺衰朽顧

臣桑榆垂迫之景莫報恩私惟遙瞻闕廷勉効蒿祝而
已為此具本令男亘齋抱赴京謝恩臣不勝懇悃之至
謹具奏聞伏候勅旨

辭免恩命疏

致仕少傅兼太子太傅禮部尚書武英殿大學士臣謝
遷謹奏為衰病陳情辭免重命事臣某伏蒙聖明因大
學士楊一清等論薦特遣行人齋勅召臣又命鎮守巡
按等官來即臣家敦趣起程臣聞命驚惶罔知攸措竊

臣本以駑劣之資昔叨重任負孝宗敬皇帝顧託之命
死有餘責皇上嗣承大統之初不即誅戮曲加恩禮存
問優恤有隆無替臣銘心刻骨圖報無由茲又渙頒寵
命賁及丘園起臣于衰廢之餘欲還臣于密勿之地且
許以優逸預斷辭章異數殊恩自昔罕比臣非木石寧
不感激思奮奈臣犬馬之年垂及八旬疾病侵尋衰憊
已甚耳目之視聽不真手足之動履欠便加以痰嗽眩
暈不時交作摧殘無用之狀實有難盡言者雖欲勉強

就道誠恐委頓不前反累陛下優老之仁莫副陛下虛
席之意且以一清等之所推薦勅旨之所期待臣自揣
淺薄雖在強壯之時亦非敢當況今衰殘如是之甚乎
臣是以趑趄縮慙寢食靡寧慚汗憂惶措身無地遙瞻
天闕徒切馳戀而已恭惟皇上英明天縱聖德日新寤
寐求才宵旰圖治此誠雲龍風虎之會而臣以桑榆景
迫犬馬力疲不能就攀鱗附翼之列咨嗟感泣不能自
已伏望聖明諒臣愚衷憫臣朽腐容臣辭免恩命俾得

保終于丘壑不致隕越于道路則始終成全之恩真同
天地矣臣不勝懇切仰望之至為此具本令男某齎抱
赴京謹具奏聞伏候勅旨

乞恩仍賜歸休疏

致仕少傅兼太子太傅禮部尚書武英殿大學士臣謝
遷謹奏為懇辭重命事臣昔濫叨任使奉職無狀引疾
乞休跼伏海濱二十有餘年矣誤蒙聖明軫念召命下
臨臣自知衰病不堪已嘗具本辭免伏蒙溫旨慰諭且

命有司敦趣臣感荷殊寵莫報涓埃只得力疾奔馳不
遑他恤幸獲進趨闕下仰瞻天顏慶忭之私無可云喻
退自省念慚懼交并恭惟皇帝陛下聖明天啓政化日
新方將展古昔帝王之大猷廣祖宗列聖之丕緒惟茲
密勿之寄必需卓越之才如臣庸劣衰頽豈宜謬玷行
列此臣審知愚分實非崇飾虛詞伏望聖慈俯垂矜察
仍賜歸休庶不貽覆餗之譏以負虛席之意臣不勝懇
悃之至謹具奏聞伏候勅旨

辭免新職疏

致仕少傅兼太子太傅禮部尚書武英殿大學士臣謝
遷謹奏為辭免新命事臣以庸劣衰殘勉趨召命自懼
不堪重任懇乞賜歸伏蒙皇上不輕棄遺益隆恩寵既
奉溫旨慰諭又蒙特勅吏部陞臣戶部尚書謹身殿大
學士臣聞命戰兢措身無地竊念臣自退休田里優游
散逸二十餘年今方進趨闕廷未及勉効分寸而遽叨
殊錫雖欲強顏承受寧不內懷慚悚臣感荷聖恩思圖

報塞萬一再不敢固求賜歸但乞容臣辭免新陞職銜
仍以舊銜供職庶幾心安理得可以圖効涓埃臣不勝
懇悃之至謹具奏聞伏候勅旨

陳政事疏

少傅兼太子太傅戶部尚書謹身殿大學士臣謝遷謹
題為獻納事臣以庸劣衰朽不能仰稱任使累疏乞休
未蒙俞允竊自思念無可以報厚恩敢陳一得之愚冀
効涓埃之益恭惟皇上赫然勵精銳意更化深懲寬慢

之弊痛革黨比之私此誠大有為之資不世出之主臣
愚何幸躬逢其盛然臣嘗聞之君道固貴乎剛居上以
寬為本求治不可太急更張亦須有漸若驟加嚴迫恐
惶駭失措者多矣且為政惟在得人才亦甚難得若
棄短取長則人皆可用小過不宥則下無全人況更易
頻數則人無固志苟圖免責事亦難就緒矣臣願陛下
大擴天地之量少霽雷霆之威明察之餘濟以寬簡剛
斷之際加以含引廣招賢之門開自新之路使有過者

可以改悔不及者可以勉力至于用舍之際務合衆論
之公如此則人不乏用事功可成矣陛下以納誨輔德待
臣臣願陛下成雍熙太和之治故不敢不盡其愚伏望
聖明俯賜採納豈惟愚臣之幸實宗社生靈之幸也謹
具題以聞

求納諫疏

少傅兼太子太傅戶部尚書謹身殿大學士臣謝遷謹
題為獻納事臣退休衰耄分與草木同腐荷蒙聖明篤

念舊臣特勅召用不容辭避且待臣以納誨輔德之任
夫朝夕納誨以輔台德此商高宗之所以待傳說者也
顧臣庸陋何敢妄希古人然思無以仰答陛下之殊遇
因敢竊取古人之緒餘以獻傳說之告高宗曰木從繩
則正后從諫則聖后克聖臣不命其承疇敢不祗若王
之休命蓋謂君德莫先于納諫君能納諫則臣下不待
命令而信從矣天啓聖明嗣承大統從諫如流天下稱
聖既而進言者執見或謬拂逆過甚致有齟齬間隔而

近來諫諍之言日益稀矣此固臣下不能將順聖德之過也臣又嘗聞伊尹之告太甲曰有言逆于汝心必求諸道有言遜于汝志必求諸非道蓋謂鯁直之言人所難受巽順之言人所易從難受者未必皆非故必求諸道不可遽以逆于心而拒之易從者未必皆是故必求諸非道不可遽以遜于志而從之蓋欲矯乎情之偏也臣愚伏願陛下兼聽廣納于諸逆耳之言曲賜優容以作忠直之氣于諸遜志之言詳加審察以遏諛佞之風

則聖德日新聖治日隆矣此輔德第一義也故敢冒昧陳之伏惟聖明留意緣係獻納事理謹具題以聞

乞賜歸休疏

少傅兼太子太傅戶部尚書謹身殿大學士臣謝遷謹奏為衰老陳情乞賜歸休事臣犬馬之齒今年已八十矣去歲誤蒙聖恩特勅召用不容辭避臣勉強奔趨忘其力之不足既獲瞻覩天顏恭謝恩命自惟衰殘昏耄無以仰副驅策即欲懇乞歸休伏蒙皇上不棄駑朽進

臣戶部尚書謹身殿大學士職銜照舊內閣辦事旋復
憫臣拜起艱難免臣常叅異寵殊恩益深感激黽勉從
事又自入朝以來仰見皇上聖德天縱而日新聖學緝
熙而罔間銳意更化夙夜勵精此誠千載之奇逢也臣
雖無似亦欲思依日月之光以觀雍熙之治奈病隨年
至力與年衰視聽不真動履欠便又況眩暈時作神思
不清今就列備員已更時月而納誨輔德莫效涓埃雖
皇上不咎素餐臣心能不自愧乎伏望聖慈曲賜矜憫

容臣仍舊歸休俾得及未盡之年遂首丘之願則陛下
始終成全之恩真與天地同矣臣不勝懇切仰望之至
謹具奏聞伏候勅旨

再乞歸休疏

少傅兼太子太傅戶部尚書謹身殿大學士臣謝遷謹
奏為衰病懇乞歸休事臣以年衰力憊不能仰稱任使
具本乞休伏蒙聖旨朕圖任老成贊弘化理卿先朝耆
舊德器才識公論素孚召用未久方切倚毗況精力未

衰豈可遽求休致宜即出供職盡心輔導以副朕懷所
辭不允吏部知道欽此臣仰承恩命益深慚懼竊念臣
迂愚無似休退有年自分與草木同腐而已猥蒙皇上
不輕棄遺起臣于衰廢之餘還臣于密勿之地實出望
外臣當鞠躬盡瘁圖報恩私使臣能效涓埃之益則雖
捐軀隕首臣亦何敢自愛奈臣衰頹已甚槁木不殊而
謬玷崇班虛糜厚祿此臣所以朝暮懷慚不能自己者
也仰惟皇上英明天縱赫然勵精寤寐求賢共圖化理

今調燮重任已甚得人而臣以朽腐無用之資濫廁其
列誠不足為有無若復苟且淹延不求退避則尸位素
餐之誚必不能免而妨賢病國之罪亦將何所逃乎伏
望聖慈俯察愚衷蚤賜俞允使臣得生還故里則未盡
之年皆陛下之賜也臣冒瀆宸聰無任戰慄之至謹具
奏聞伏候勅旨

謝恩疏

少傅兼太子太傅戶部尚書謹身殿大學士臣謝遷謹

奏為謝恩事臣昨以衰病乞休荷蒙溫旨慰諭未即賜
允情不獲已再疏懇乞復蒙聖旨卿兩疏乞休情詞懇
切朕所深諒但朝廷任賢求舊卿碩德舊臣方切倚任
豈可固求休退宜即供職不允所辭欽此即又重荷聖
慈軫念命太醫院官診視用藥又命內臣頒賜酒肉米
蔬等物又命鴻臚寺官來家宣諭殊恩異數倍萬常倫
臣感極而泣不能自己即欲詣闕稱謝勉強供職以圖
報涓埃奈臣痰火眩暈之疾舉發無時恐或顛仆階墀

貽笑班列是以趑趑縮縮尙在調理謹先具本謝恩竊
念臣年既耄身已衰甚病非外感藥物難療每自忖度
朝不保暮恐終無以報塞厚恩伏望聖慈曲垂矜憫蚤
賜允俞俾得生還故里則始終成全之恩沒齒豈敢忘
哉臣無任懇悃之至謹具奏聞伏候勅旨

三乞歸休疏

少傅兼太子太傅戶部尚書謹身殿大學士臣謝遷謹
奏為懇切陳情乞賜歸休事臣以衰病昏耄不能仰稱

任使累疏乞休荷蒙溫旨慰諭未即賜允即又重荷聖
慈命太醫院官診視用藥又命內臣頒賜酒肉米蔬等
物又命鴻臚寺官來家宣諭皇上篤念舊臣不忍輕棄
恩禮優渥有加無已而臣不能圖報萬一是以面熱內
慚寢食俱廢惟乞身引退庶可少贖負恩之罪隨即具
本陳謝復申前懇乃又節蒙聖旨如病痊可宜照前旨
即出供職以副朕名用倚毗至意不必固辭欽此臣聞
命戰兢益切慚懼已於今月十六日力疾入朝陛謝思

欲勉強供職圖効涓埃奈痰嗽眩暈之疾忽復交作動
虞顛仆不能支持臣年既衰邁病復纏綿雖欲苟延不
過虛糜廩祿而曠職怠事之咎抑將何所逃乎臣是以
不避煩瀆冒昧懇陳伏望聖慈曲垂矜憫蚤賜允俞俾
臣得遂生還之願則始終成全之恩真與天地同其大
矣臣不勝懇悃之至謹具奏聞伏候勅旨

四乞歸休疏

少傅兼太子太傅戶部尚書謹身殿大學士臣謝遷謹

奏為懇陳愚悃乞賜殘骸事臣以老病乞休再四陳懇
伏蒙聖旨朕以卿先朝耆舊况輔臣所薦特虛席以待
其所倚毗非輕望以匡弼朕躬贊襄化理卿屢屢為辭
固欲求去大臣事君當以竭誠盡心為忠舍邪從正為
本庶可引君當道為善治以福斯民卿宿儒博學理慾
公私豈不曉然可勿以去為辭即出辦事副朕求舊名
用之意欽此臣聞命驚惶不勝感泣皇上所以俯念老
臣者禮遇優崇慰諭諄切天高地厚之恩有隆無替顧

臣何人可以當此臣遵奉聖諭敢不痛自修省仰承德意即欲勉強供職圖効涓埃奈臣犬馬之年已及八十五元氣虛耗疾病交侵手顫足痿目昏耳聾痰鬱氣逆胸膈痞懣而眩暈顛仆時切懷憂朝夕不能自保恐難久于人世此臣之所自知而急欲求去者也若年力尚可支持而崇飾虛詞苟求安便則臣之罪無所逃矣恭惟皇上好生之德真同天地優老之仁遠邁帝王臣是以敢冒昧陳懇煩瀆宸聰伏望聖慈曲垂矜憫蚤賜允俞

俾臣垂盡之齡得全歸于首丘而未朽之骸不隕越于道路則臣雖不能圖報于生前亦當感恩于地下矣臣不勝激切仰望之至謹具奏聞伏候勅旨

謝恩疏

少傅兼太子太傅戶部尚書謹身殿大學士臣謝遷謹奏為謝恩事臣以衰老病憊懇乞歸休荷蒙聖慈憫念特賜允俞而寵禮優渥體恤周備已不勝感激今日蚤陛辭復蒙加賜白金襲衣文綺寶鏹以為歸榮聖主所

金史卷一百一十五
卷一
以惠養老臣者無所不用其至誠天高地厚之恩也臣
稽首頓首拜受訖顧臣桑榆景迫已無圖報之日即今
違離闕廷徒切戀慕惟迴瞻北極祝聖壽于萬年尤願
慶協前星綿本支于億世此臣區區犬馬之忱沒齒不
能少忘也謹具本稱謝以聞

歸休謝恩疏

致仕少傅兼太子太傅戶部尚書謹身殿大學士臣謝
遷謹奏為謝恩事臣以年邁力疲不能仰承任使懇乞

退休荷蒙聖慈憫念曲賜允俞厚加恩典且命臣男中
書舍人正護送還鄉臣以垂盡之齡幸叨恩庇遂得道
路無虞生還故里苟延殘喘以終餘年仰惟皇上優老
之仁真同天地而臣以朽腐之質莫報涓埃還家以來
捫心自愧惟朝暮引領遙瞻天闕虔祝聖壽無疆同天
長而地久更願聖學罔間務日就而月將用康九有之
生靈益隆萬年之宗社此臣區區犬馬之忱也謹因臣
男正回還具本令其齎抱赴京少申謝悃謹具奏聞

謝恩疏

致仕少傅兼太子太傅戶部尚書謹身殿大學士臣謝
遷謹奏為謝恩事嘉靖七年閏十月初六日臣本府官
欽遵詔旨恩例備綵帛羊酒來家問勞天寵光被閭里
歡騰臣不勝感戴謹稽首頓首登拜領受訖恭惟皇上
孝治天下尊親爰舉彛章加崇徽號又推廣孝之道誕
敷錫類之仁詔示萬方恩覃庶類甚盛典也臣以衰朽
之質荷涵育之慈方遂歸休躬逢嘉會濫叨殊錫夔出

常倫何幸如之愧不能趨覲闕廷隨班慶賀仰瞻宸極
馳情祝頌而已伏願皇上純嘏天錫益隆至養于萬年
聖治日新永得歡心于萬國臣不勝懇悃之至為此具
本令弟謝遜齋抱赴京謝恩謹具奏聞

謝恩疏

致仕少傅兼太子太傅戶部尚書謹身殿大學士臣謝
遷謹奏為謝恩事臣某伏蒙聖恩以明倫大典書成特
差鴻臚寺序班楊孫元頒賜臣一部天寵光被閭里歡

騰臣不勝感戴謹稽首頓首登拜領受訖恭惟皇上誕膺天命纂承大統倫序素定普率歸心誠非前代嗣統之君所可擬倫者也皇上德隆孝治禮重尊親明倫大典之作昭揭萬古之綱常式成一代之典則此誠大聖人之制作非尋常膚淺之見所能仰窺者也臣質本迂愚年復衰耄往歲強趨召命旋乞歸休重荷聖慈憫念俯賜允俞雖嘗濫叨總裁之命未能少効微勞及至書成進御之時不獲追隨班列上辜恩遇內省慚惶念茲

寵錫自天臣實措躬無地禮當詣闕稱謝而又衰病不
前謹具本令男謝豆齋抱赴京謝恩臣遙瞻闕廷無任
戀慕之至謹具奏聞

歸田稿卷一

欽定四庫全書

歸田稿卷二

明 謝遷 撰

序類

山庄唱和小序

是歲夏雪湖三過余杏庄夏初迄仲頗有旱暵之虞既而連得雨農事孔嘉且雨中倍涼爽吾兩人相與盤桓甚適時復賡一詩為樂韻仍舊而意彌新各得詩二十

四首而別別後餘興相往復又各得四首時則夏季向
秋旱復如初夏故其間不能無憫農之意也自予歸汝
曲閒中與雪湖以文字相娛唱和不少今夏會尤數詩
尤多故特錄為一卷後會有作當更續書之也時甲戌
六月晦日木齋識

湖山唱和序

予既謝事歸養痾海陬知舊多疎絕蓋以零落殆盡間
有存者亦相遠逾時經歲不獲一聚首雪湖素莫逆居

甚適且強健無恙日相與往還雪汝兩湖之間山水頗
幽勝盤桓不厭雪湖工于詩酷好吟咏興至時輒有作
予雖拙強而企焉有唱斯和因以為樂不知老之將至
也居無何予橫罹罪累戒吟思咎于時雪湖亦有母夫
人之憂杳然絕響者幾三載洎予蒙寬宥雪湖亦從吉
乃復作積久遂盈卷帙蓋雖消閒遣興而其間懷君愛
國憫世憂時之意亦自有不容已者吾邑尹劉侯應徵
知吾二人之有是也強索觀之不以為蕪陋輒令從事

史錄之以去將以供燕覽且請予識其顛末予不能拒也嗟夫采詩以觀民風固王政之大端國風所陳無間美惡非徒然也去古既遠有司者從事于簿書期會之間日不暇給能者亦不過取辦承應苟免督責而已矣其知觀風審音不以為不急之務而蔑棄焉者幾何人哉不圖今日乃于吾劉侯得之良可嘉也吾輩詩雖無足采然閭閻之疾苦稼穡之艱難施措之缺失苟因其端而推見其至以究心于其間則亦豈非善政之一助

也哉夫然則侯之尚文好古誠不為虛飾而吾輩之吟風
弄月亦不為無用矣詩凡若干首為二卷聯句若干首
并附錄焉

會老嘉話序

宮保大司寇兼都憲兩峯洪公其先上虞人也今年秋
自杭城歸展先塋既竣事乃訪予海濱予初與公同進
士第意氣孚合相視如弟兄宦路周旋餘三十載迄予
謝事歸道經淮揚值公以巡撫之節兼總漕運留戀不

忍舍慨然以女許配吾子亘遂締姻盟後五年公總師
川陝荆洛旋休致歸杭公女不幸殤折然時節問遺不
廢往還公二子靜夫鉅夫亦視吾諸子如昆弟通家眷
愛之情有加杭城去吾邑僅三百里乃有錢塘曹娥餘
姚三江之隔舟車跋涉良艱欲與公一晤言不可得停
雲之歎恒切于懷聞公來喜不自勝亟遣吾子正丕往
候于上虞途次且邀憲副雪湖馮公過予山庄出高橋
同迂之雪湖吾姻家老契與公同鄉薦同官秋曹素莫

逆者也已而同年友太守滑公宗源亦來會時則鄉彥
孫生維獻介公行而吾弟廸及正丕皆侍焉杭州衛總
麾白侯允章頗好事公推愛之適有事臨山偕揮使李
侯克明俱來謁李亦吾姻家公德輝所及人固快覩之
也盤桓累日賓主盡歡最後同過臨山訪雪湖復盤桓
追送至上塘而別予與公話舊之餘時賦一詩道意公
和之衆皆屬和自始至暨別凡得詩若干首鄉邦縉紳
亦有聞而遙和者正總緝成卷曰將以為後日嘉話之

徵也於戲太丘朗陵之會漢史傳之至于今人羨之不
衰豈非以其名德之盛有足起人敬慕者乎余陋劣不
敢妄希古人若公望重當時視古無忝況公之是行水源
木本之思姻親交友之誼實兼得之又有所出于古人之
外者安知後之視今不猶今之視昔也耶

贈都憲何君巡撫河南序

聖天子嗣承大統肇更化理剗剔蠹弊登崇俊良于是
吾浙左方伯何君道亨遂有巡撫河南都御史之擢予

聞之喜因仰而嘆曰聖智天授真知更化之要哉夫廉耻者士大夫之大閑風俗者國家之元氣也往自怙勢竊柄之奸作大啓僥倖之門而士習為之一變貪汙奔競波蕩風靡剝之政日加于下而生靈困憊有不忍言者矣今欲一洗而新之不在表率之地激揚之任乎道亨初為御史即著聲臺端間以直言為讒邪所中傷紛紜之際濫係黨籍已而大慙就戮善類稍甦乃起為郡守薦歷憲副至長吾浙憲陟方伯盤桓居貞于茲有

年清白堅持終始如一吏畏而民懷之不次之擢縉紳
屬望久矣茲當善治之初首膺簡拔則夫所謂激揚表
率于一方者真可謂得人矣且道亨嘗守河南儉德雅
操素孚于人今其往也風聲所至蓋將不令而行郡守
庶寮有不惕然革心者乎閭閻小民有不蒙被其澤者
乎中州大藩切近京輔異日政成化洽入長內臺以當
股肱耳目之寄以昭四方風動之休以成一代明良之
盛又將不在吾道亨乎道亨行予以知舊之愛既為作

一詩而藩司諸同寅復以贈言請不能辭故復道吾意所未盡者如此

使軫贈言序

余自乞骸歸海壖十有六年于茲每竊思念辜敬皇末命罪無所逃幸而苟免誅責乃閉戶養疴待盡而已皇上誕膺天命嗣承大統聖德廣被政化一新以某先朝舊臣特蒙軫念賜勅遣官存問于時錢塘進士邵君某試政春官攝行人捧勅以來君小心翼翼將命惟謹至

則奉宣德意既優且渥光被草萊遐陬僻壤之間老穉
歡呼填塞閭巷臣某寵榮踰分愈縮慙戰兢措躬無地
而鄉里縉紳大夫士乃以為曠世殊典咸為某歆羨不
置故于邵君之還侈為詩歌以贈非直以壯行色實以
頌聖德昭盛傳于不朽也謂某亦不可以無述余何以
為邵君贈哉余嘗讀皇華之詩始而曰周爰咨諏既而
曰周爰咨謀曰周爰咨度曰周爰咨詢反覆丁寧不一
而足蓋古昔聖王遣使于外欲其宣上德而達下情故

以廣詢博訪委之為臣者亦惟恐不盡其職而諏謀度
詢無所不用其至也方今聖明更化諏咨善道下逮民
隱如恐不及邵君奉使雖為存問老臣而來然自京師
而抵南服往返數千里間道路之所經行耳目之所見
聞得咨訪者多矣抑古者采詩觀民風蓋謂閭閻里巷
之情狀率于歌謠見之君子諸縉紳贈行之作而玩索焉
則民風之堙鬱亦或有得于言意之表者歸而併獻諸
當宁以廣聰明之萬一則亦豈非老臣之所願望者哉

贈邑宰丘君以義被召之京序

吾餘姚以文獻稱久矣而蒞茲土者往往有畏難之色豈文獻足徵之邦顧不若荒野鄙陋之地之易治乎是盖有說矣夫惟地大故人衆人衆故事繁事繁故政劇苟非操持之有要施措之得宜則簿書填委期會叢脞日給不暇誠有不勝其難為者勢固然也今觀吾丘君之蒞吾邑則又祇見其易乃知非地之難人自難耳君以妙年登進士第初踐仕途即蒞茲大邑閱厯未深而

臨事之際從容裁決動中肯綮若老于世故者始至持
法甚嚴凜不可犯及夫威令既行豪滑斂避則更濟以
寬和所謂平易近民者君實有之久之上下相孚令不
煩而事集蓋其明敏果斷天資過人而將之以廉慎勤
恪故能得夫操持之要施措之宜如此吾邑負難治之
名至君而一洗之矣故今甫及二載聲譽籍甚觀風之
使數加旌獎銓曹以聞于上召命遂下將有臺憲之擢
吾既喜公道之明而又悵吾邑人之失所恃賴欲留之

而不可得也噫若君之品識固宜駸登顯秩洊膺重任以膏澤天下豈吾一邑之人之所得私也哉君行矣其尚益堅乃志益慎乃心益弘乃業庶幾永終令譽以慰吾邑人去後之思是則區區之所願望者也

贈都憲某公序

某公當代風力士也當其官都察院右副都御史領四川巡撫之節藩司同寅諸公重其行以贈言見屬公之來莅吾浙也雅志為民事必循軌度其律已甚嚴無所

撓屈時方有貴倖來有事于浙憤有司將迎之弗至文
致其罪而波及于公坐是待報者累閱月人皆為公危
之公自處裕如惟俟命而已既而聖明察知其非辜俾
還職未幾乃有超擢之命輿論咸以為宜蓋公之節行
夙有源委卓然樹立不忝其家乘粵自初登進士第列
職郎署以至敭歷藩省在在有聲為縉紳所推重予病
卧海濱雖罕所交接亦頗聞其槩洎來吾浙目擊其行
事益信所聞之不誣今其行固予所喜聞而樂道者言

何能辭顧惟衰耄之言何足為公重然亦竊有欲告焉
者夫致治之要莫急于厚民生以固邦本自昔聖帝明
王之治未有不以是為先務我祖宗列聖相承尤惓惓
焉百數十年來深仁厚澤固結于民心者至矣故雖或
有釁孽而遠近無離心良以是也比歲災沴頻作饑饉
薦臻而官府無名之科需日益以繁生民之膏血日就
竭矣任司牧之寄者乃恬不介意真若秦人視越人之
肥瘠何哉蓋自權奸竊柄以來倖門大啓士習為之一

變惟其身之謀而罔知閭閻疾苦之當恤者亦多矣雖更維新之化餘風尚未盡殄此有識者之所深憂而竊歎者也轉移之機不在激揚表率之地乎公今之蜀蜀固其舊治也一方興革宜知之已悉今之權任又非曩昔之比即其所被及于吾浙者而推之則其所以慰棠陰之思于蜀人者不言可知矣蜀之人一何幸哉異日政成化洽譽望益隆進長內臺當天子腹心耳目之寄則其膏澤所及又豈直一方而已哉請以是為公贈

胥谿八咏詩序

胥谿八咏詩者建平呂君文郁思其親而作也士大夫
交于君者從而和焉久之成巨帙而以序來請予憶曩
歲鄉友賈郡博汝易嘗道文郁之賢與胥谿之勝領會
心目之間有日矣于其請也能不為之言乎夫所謂胥
谿者蓋文郁所居之地當吳楚之界伍子胥棄楚入吳
嘗渡此谿而憇息焉後人仰子胥之忠孝遂以名谿文
郁之父仲和翁因取以為號其名益揚翁性恬澹日徬

徜徉胥谿之上當其耕讀釣隱意與景會之時雖世所謂台鼎之榮陶猗之富舉不足以動其心而移其志是胥谿之景天若為翁而設然非翁則亦莫能賞識如此其至也翁沒十有三年文郁登甲科官郎署翁獲褒錫之榮而養不逮胥谿之勝固在也古者孝子思其親于居處笑語志意樂嗜必極其想象形容之真文郁之于胥谿其能一日已于情乎此八景之詩所由作也此諸君子所以繼聲而不容少靳也嗟夫勝景之在天地間

不幸遇非其人而淪没于荒烟宿莽之中者多矣胥谿之勝固以翁而勝然非文郁為之揄揚則有聲之畫摹寫逼真又未必若是其工且富也是集既傳豈惟益著胥谿之名而文郁不死其親之孝亦于是乎顯矣抑水注川為谿是其涓涓之泉可達之而為盈科放海之勢翁之所取于胥谿者不有在于是乎源故澄而濬之以比潔已之操流故長而導之以喻澤物之功是八景之外又翁之所獨得而未及究竟以望其後人者茲文郁

推胥谿之意潤漑斯民固足以漱餘芳矣他日以其澤
澤天下使谿山人物並美交重則有志乘史冊在是集
特為之發軔耳予雖老尚拭目以俟正德丙寅孟夏既望
記類

旌忠詞記

旌忠祠者有司奉上命以祀死忠之臣也正德己卯夏
六月十有四日寧藩逆賊宸濠反假宴會集撫按藩臬
暨諸司于庭環列兵刃首呼巡撫都御史餘姚孫公燧

詐稱密旨令起兵脅使從逆公正色抗詞折之請見密
旨濠語塞公復矢以天無二日臣無二君之義次問按
察副使固始許公達亦毅然曰惟有赤心耳豈從反乎
濠怒令兵校曳出惠民門戕之二公罵不絕口延頸受
刃時方盛陽日慘然無光忽有黑雲蔽其屍竟日父老
奔赴飲泣為歛于僧舍朝夕哀之濠見黑雲之異亦驚
怖遣人為市棺而棺已具諸民矣蓋逆濠之蓄異謀為
日已久孫公窺見其萌允所以預為之防者靡不用其

至濠務剝下以結權倖民不聊生公志在恤民每裁抑
之動拂其意許公亦同志濠故知其必不可屈也首肆
毒且用以威衆民亦以是哀感之深也既而巡撫南贛
都御史王公守仁起義兵討賊濠敗遂伏誅恭遇皇上
嗣承大統詔禮部官議褒恤而巡按御史唐龍復疏請
廟祀二公奉旨贈燧禮部尚書謚忠烈達左副都御史
謚忠節賜塋祭有加各錄蔭其子且命立祠享祀南昌
城中舊有土神廟一區父老撤去神位奉二公祀之私

號曰全大節祠以時謁禱及奉朝命有司遂修祀事于
茲而淺隘弗稱巡撫都御史陳公琳嘗檄布政使陳策
蔣曙按察使曾大有謀改作事未就緒各遷代以去都
御史盛公應期繼至巡撫素重風教慨茲祀典宜隆乃
檄布政使王蓋嚴紘叅政徐瓚林廷楫馮馴叅議陸溥
陳墀暨吾弟迪按察使丁沂副使周廣諮度之僉謂貢
院舊址面俯東湖明爽宏邃足以妥英靈而起瞻仰白
于鎮巡諸公咸可其議乃委南昌府同知劉守愚率縣

丞彭齡等董其役經始于嘉靖癸未秋九月迄甲申春
二月而落成矣先是正德壬申瑞州華林寇猖獗按察
副使安陸周公憲督兵追勦身先士卒父子俱殞于賊
事聞已蒙贈憲按察使謚節愍而未與祀典盛公疏請
于朝下禮官議合以死勤事之義特先配享旌忠祠綸
音遠降適新祠考成乃奉孫許二公並位南向而以周
公配享于左于時左布政使陳洪謨始至率僚屬祇薦
歲事廟貌崇嚴山川改觀忠魂義槩儼若著存式慰邦

人瞻仰之情祠五間前為享堂又前為中門為外門各
殺其二廂廡庖湑及諸供祀之所以間計者凡二十緯
以周垣深以丈計者四十有八廣以丈計者二十有七
既完既固瞰湖豎綽楔石為之扁曰旌忠遵聖訓也凡
木石工役之費皆出自官帑于民無秋毫之擾經畫調
度纖悉畢舉皆盛公所指授也于是盛公遣使致書屬
予紀其成吾弟亦以書來促此固區區之所欽羨而樂
道者也何敢以衰耄辭嗟夫為子死孝為臣死忠誠天地

之大義也義當死則舍生而取義降衷秉彛人孰無之
聖賢立教垂訓昭如日星章縫之士亦且素講而飫聞之
矣然非見之真信之篤守之固而能不迷眩于臨難之
頃者幾希若三君子者捐軀殉國從容慷慨白刃如飴
視昔顏索二公之在常山張許二公之在睢陽蓋異世
而同符非其胸中確然素定能如是乎真可謂無忝所
生不負所學者乎彼螻屈鼠伏苟一時之生者能無愧
于心乎江西舊有康山廟祀三十六人豫章廟祀十四

人皆開國時死忠之臣也仰惟我聖祖再造區夏振綱
常于淪斃之餘故當時同德不二之臣雲合景從其盛
有如是者百數十年來列聖相承仁涵義育內寧外安
仗節死義之士無所于見往歲逆豎竊柄推挫善類余
懼夫士氣之沮喪也每竊憂之今適遇事變而二三君
子挺然繼作光昭前烈所謂疾風知勁草歲寒知松栢
信不誣矣天地之正氣祖宗之遺澤不于是在乎此又
深為世道慶也嗚呼旌忠之祠與前二廟列峙邦域輝

映古今以風勵于天下豈直一方之偉觀一時之美談而已哉

重修定海縣學記

正德庚辰都御史高密李公昆左遷浙江按察司副使領巡視海道之命駐節定海首詣學謁廟目擊圯敝慨然以修復為己任適邏吏獲海艘非式者鬻直足克其費遂定議于巡視都御史許公庭光巡按御史唐公鳳儀僉曰宜乃以厥成責之知縣鄭君餘慶始事于是歲

之夏六月訖工于辛巳之冬十二月像設嚴整規制宏
遂自殿廡祠宇以及齋堂廨舍庖湑之類罔不改觀甃
石凡若干所繚垣凡若干尺闢地凡若干丈增屋凡若
干楹財不告匱民忘其勞是雖鄭君經營之功大都出
李公指授也考之縣誌定海有學自宋雍熙始中間興
墜屢矣至我朝成化間憲副朱公紳嘗一新之迄今五
十餘年而修舉盛美乃于更化之會見焉不亦有數存
乎其間耶鄭君重念李公之績不可泯乃託吾姚鄉進

士毛君復懇以記請逸何敢以難為言辭哉惟定海為
萬水之會東望滄溟浩渺無際潮汐之往來日月之吞
吐魚龍之出沒一舉睫而具見實大觀之區也昔我夫
子亟稱于水豈徒取其周流無滯而已哉盖道之所遇
觸目會心自不容已川上之歎可想見也茲宮墻再新
聖靈斯妥亟稱而歎之意宜必有無間于存亡者乎然
則遊聖人之門者當何如必探無窮之道體事有本之
學術克朝宗之念大迴瀾之力庶幾其無愧乎斯固李

公作新之意也是役也縣丞胡良主簿吳恭典史趙大和教諭李儒訓導劉綬李泰生員沃汝信薛俊周南義官俞章皆與有勞者因得附書

墓誌銘

明故安處士墓誌銘

吾邑宰西夏楚君書每為予談其鄉人安氏之盛累世不分財異食家衆千指雍睦無間言予聞而嘉之既而安氏之子指揮廷璋遣其弟來托楚君乞予為銘其父

處士之墓予以衰耄筆硯久荒辭之固而楚君之請益力不得已則序而銘之處士諱海字士溶其先姑蘇長洲人也高祖諱福三國初從軍以功陞總旗調寧夏中護衛係籍至今曾祖諱忠祖諱昱考諱某今官千戶者曰廷璧蓋處士從子也處士自少倜儻負驟不羣涉獵書史頗通大義天性孝友事親能先意承志不少忤遇同氣怡怡如也識達事體每億料多中人有疑勿能決者多就質焉縱游淮浙荆湘間惟意所適晚樂維揚風

土之勝遂僑寓成家素殷裕至處士益克拓貲累鉅萬然好施予周貧恤匱雖倒囊傾橐無吝色鄉鄰姻黨有依之以終身者四方文人墨士與之游者無間遠近久而益敬每以古人嘉言善行訓迪諸子姓子姓服其教皆循循雅飭家族衆盛今且六世矣無異籍者比有司以事聞詔旌其閭正德丙寅二月朔日以疾卒于維揚距生景泰甲戌四月望日得壽五十有三配孺人黃氏西夏士人諱璟之女有淑德善理家政處士遨遊湖

海無內顧憂家聲輯睦無少間亦以有孺人助于內也
孺人卒于嘉靖癸未四月一日距生景泰甲戌八月十
一日得壽七十子男四人長即廷璋例授寧夏中屯衛
指揮次廷璽廷珍俱秦府引禮舍人次廷璿善服賈克
家女一適寧夏中屯衛百戶劉璿孫男五宗文宗武宗
賢宗哲一尚幼女三長適衛庠生陳經世次聘高烈俞
權廷璋輩將奉處士及儒人柩合葬夏城之南原塋以
某月某日嗚呼自世教衰民行日薄能惇德崇義承家

睦族內外無間然者蓋亦寡矣而有之豈非君子所樂
道哉若處士者宜可書也故銘以章之銘曰九世同居
昔聞公藝寥寥千載乃見安氏家衆千指而食不異雍
雍一門亦且六世詎謂戎伍懋茲德義啓後光前實惟
處士夏城南原堂封斯闕我銘非諛用詔來裔當克承
之引而勿替

墓表

憤齋先生墓表

先生吾先妣夫人之弟諱珙字廷璧姓鄒氏憤齋其自
號也先外祖悠然處士與外祖母俞孺人德善重于鄉
慶鍾先妣及諸舅先生自幼秀穎異常長而篤志力學
風格凝峻言動不苟人望之而起敬愛與先考簡庵少
傳年相若以學業行誼相砥礪友愛如同氣先祖直庵
少傳視之如親子弟然初蒞官閩藩時携以自隨遣就
政和縣學司訓錢塘馮先生浩授詩經業成而歸鄉里
大家爭延致為子師吾謝氏族屬頗衆曾叔祖克成處

士素好禮合一門子弟師之某時方垂髫獲從諸生後見先生終日端坐不惡而嚴諸生一聆警效即竦然各肄其業罔不就規度蚤暮升散出入在途次亦循循有序鄉中父老見而知其為鄒先生學徒也臨山衛帥李侯選城中子弟之秀者幾百人闢館舍十餘楹延先生教之武弁家素號多頑劣先生學規嚴整率皆領其教無敢違氣習為之一變至今衛中人猶慕之成化初詔求經明行修懷才抱德之士餘杭知縣朱某舉先生應

詔至京師在朝縉紳大夫士聞其名多遣子授業已而銓曹泥于例須本縣官舉遂為有力者所奪先生拂衣歸仍應浙江鄉試復不偶無何嬰股疾醫藥罔效遂不起成化戊子冬十二月十二日也時年方三十有六鄉邦衣冠之士無問識與不識莫不痛悼之嗚呼某嘗聞之記曰凡學之道嚴師為難師嚴然後道尊道尊然後民知敬學世教衰微師道之不立久矣使如先生者得見用而任國學郡邑之師則其所造就豈胡安定得專

美于前哉乃終不獲一試惜哉先生雖專經業而雅好吟咏詩法盛唐所著有憤齋稿藏于家先生世業儒家不甚充裕而篤于孝友平素所得束修之資悉以供門戶費無一毫私蓄及其歿人始知之配胡氏烏山處士諱鼎之女淑慎儉勤相先生恪遵婦道子男三人昌蚤卒昇仕武平衛經歷果未周而孤能自立女一人適同邑魏某孫男五人紡紀絢組練絢組俱為邑庠生絢力學如先生頗有時名繼述顯揚之美其將在絢乎先生

歿六十有餘年矣而墓上之表尚缺是某之罪也某今亦老矣恐後遂湮沒無聞焉故力疾為纂述其梗槩如此令吾子中書舍人正為書而刻之若其家族世系則具見于悠然處士行狀此不復贅處士狀先祖直庵少傳所撰也

題跋

題史都憲墨竹卷後

嗚呼此吾友一拙公手筆也以遺仲子鸞鸞珍藏之如

拱壁既免喪間以示予予為之泣然者久之公平生樂
易簡澹不役役于利而獨好游藝適情墨竹其尤工者
也每以是自詫人求之亦不甚吝然公歿未幾而流落
人間者已不可多見豈人與琴俱亡耶悲哉鸞以手澤
存焉寶愛之至可為能子矣鸞素稱孝友慎篤予愛之
重之今觀于是而益信視彼徇利忘親雖其親所甚鍾
愛者不啻秦越之相視而惟利之圖人鄙之殆若犬豕
而彼方且自以為得計者豈直雲霄薰壤之相遠哉予

不欲斥其名而于是焉發之猶庶幾其或因吾言而有
所悔悟耳

題旌節錄後

旌表節婦所以樹風聲勵衆志昭勗則厚民彞甚盛典
也近例其人未及旌而沒不復與是典此實執事者沿
襲拘礙之過也豈朝廷立法之本意哉夫自世教衰民
俗漓貞志堅操完節全名求之縉紳大夫士已不可多
得況婦人女子乎而有之則雖異代隔世猶當搜訪而

表章之以示後況在當時耳目之所及者乃復旁出條格而沮尼之俾湮沒無傳焉謂之何哉吾固以為執事者之過也若洪雅李節婦者州閭鄉黨信之無間言郡邑亦既以聞于上矣方下觀風者覈實未及報而節婦歿事遂寢及其子吉為廷平乃具疏懇請至再至三不已上憫其情特許之于是旌表之詔與貤贈之勅一時並下而節婦之勤劬堅苦始獲暴白于世不然幾何而不泯然也耶嗚呼是母之貞節足以信輿論是子之誠

孝足以動宸衷皆可傳也使非遭際聖明洞燭幽隱亦何以得是哉然則吉之所以移孝為忠以圖報塞殊遇者亦當何如也耶

題趙御史丹陛糾儀圖後

此監察御史古已趙君像也君嘗侍朝糾儀繪為圖以侈榮遇守谿翁為作贊詞意已獨至君來浙間以示予夫禮莫嚴于朝廷故朝儀以御史糾之懲不肅也然殿陛森嚴天顏咫尺雖甚獷悍無良者至是亦神悸膽落

其誰敢不肅哉乃或有愆于儀者蓋奏對興伏之頃進退周旋之際倉惶失措故爾朝廷設御史俾司風紀以肅百僚則其職之所當糾繩者豈直儀節之末而已哉置流歎而問齒決舍豺狼而問狐狸君子謂之不知務君之賢宜必知所擇矣君茲來鹽法是綜施措得宜憲節所臨奸豪屏跡吏民畏而懷之非知務能如是乎操是以往所至殆未可量也君尚勗諸

題李西涯翰墨卷後

涯老詞翰精妙人求之不甚靳予與公為寮友餘三十載相愛甚厚吾兒丕又獲與其子兆先同筆硯麗澤相資者有年兆先不幸蚤逝公視丕如其子故尤加之意此卷精絕大非尋常應酬者比睽違來追惟疇昔游從笑語之歡邈不可得未嘗不悵然興懷每見其翰墨如接風采聊以自慰今年秋聞公奄作古人矣俯仰之間已為陳迹殆非虛語嗚呼悲哉閒中偶閱此卷為之泫然因識之

題西涯詩篆卷後

甲戌夏杏庄與雪湖唱和消遣詩頗多間因便摘寫數
首寄西涯已而西涯寄和還以吾長子正稍習篆學素
愛之故特示以篆體又慮傳附者或為殷洪喬再寄一
通至此其後至者也正什襲謹藏之念昔居京時吾三
人雅相好無何雪湖蚤暎違予與西涯居獨久今歸老
復得與雪湖遊而西涯遠隔數千里疇昔燕笑之歡邈
不可得每形諸夢寐來和有云惟應兩巾履長得夢中

遊又云羨君江海上猶得舊同遊者乃彼此之衷曲而公道之也不意公奄忽長逝矣嗚呼聚散存沒之感可勝言哉偶與雪湖一展卷相對酸楚不能已因以唱和原韻列于前而以哭公之詩係其後云

題趙松雪墨跡

趙松雪翰墨妙絕當世後人乃有美女插花之譏蓋病其太媚媚則媚矣不知其筆法自晉來媚中亦自有道勁處近世刻本失真殊非本來面目學之者復效顰太

過遂漸相遠往往見其墨跡何嘗如傳刻之甚耶西賓
朱國材出此帖示予予為持此論國材素得書法三昧
者不以予言為不然遂識之

題一拙墨竹卷後

都憲史公善墨竹每以是自適所作甚富然不吝與人
公既歿其家篋笥所遺者無幾此卷蓋其得意仲子鄉
貢進士鸞特寶藏之歲久如新嗚呼平泉花木丁寧告
戒不知當時子孫竟能保守之勿失否公雅量博愛雖

所好不自私未嘗以戒子孫鸞乃愛護惟謹亦可謂賢
矣鸞孝友淳篤謹節不苟繼述之圖實遠且大此特其
細者耳不幸天不假其年齋志以歿哀哉鸞歿無後吾
子編修丕自少同筆硯知其志意所存懼或流落非人
也代為收藏之公與予莫逆視丕猶其子丕今于公手
澤不異乎鸞也固宜間以告予予為忍淚而識之

題范以貞太守誥勅重榮卷後

朝廷錫命于臣而及其親所以勵臣節也涖官盡職為

人所稱道誠足以貽親之榮否則辱亦隨之以貞守寧國去郡幾三十年矣而其人思之不衰且有去思碑之作真可謂無忝所生而于上之錫命亦無負矣展卷之餘為之三嘆

直庵存稿後跋

先祖光祿公豪邁曠達平生有所作握筆伸紙頃刻間雖數千百言未嘗須構思惟其易也視之若不屑為故未嘗存稿晚年家居時某始將成童出就外傳之餘侍

左右私竊記錄得數篇及稍長畧通文義則公已棄背
矣既又重莅海溢之變家下文籍斷編殘簡皆沮洳之
末故所存者止此耳痛哉某今亦已老懼公手澤遂泯
焉無傳也命兒輩輯錄之以系諸家嗚呼天機雲錦
僅存尺寸識者固可窺見其全幅矣

曾祖考妣行實

先曾祖考府君諱廣字原廣以字行姓謝氏其先台州
臨海縣人也始祖諱長二宋末徙家餘姚東山汝湖之

汭上世譜牒失傳茲不敢妄述長二生明四明四生還
一還一生壽松壽松生回益回益生見賢配余氏生府
君自始祖定居來子孫繁衍多至數千百指遂為一巨
族而世業耕讀安分自守無怨惡于鄉人雅稱善門至
府君坦夷惇篤喜怒不形自少至老與物無競尤以長
厚稱比鄰有無賴者陰驚狡黠肆為橫逆睚眦之際輒
昏夜火其廬鄉人畏之如蛇虎府君朝夕相與一于信
誼終不以惡人視之彼亦不敢有所加也既而其人為

怨家所報復合門煨燼寒舍棟宇密比幾為所延少頃
風逐火熄歸然無恙鄉里嗟嘆咸云天道為有知也府
君弱冠而孤克自樹立門戶賴以不墜與弟原度處士
相友愛白首不渝處士得子遲以庶子璵為之子已而
處士自有子亦竟不返蓋其友于之篤彼此無間也故
今孫支相承雖五服已竭而雍睦弗替至于宗族姻黨
親疎遠近雖不同亦無不感其德者至于今猶頌之不
衰府君生洪武甲寅正月七日卒正統壬戌十一月二


十六日壽六十有九明年某月日卜葬湖南鷄鳴山之
麓夫人嚴氏出同邑望族家素殷厚不好奢靡初歸府
君時值生事稍落乃以勤德相更益克裕門內百口罔
不宜之天性慈仁或聞傷人害物之事掩耳感額若將
浼焉尤好施予老而彌篤遇有乞貸者盡脫簪珥不吝
先祖少傅公性至孝見簪珥有缺輒備具以奉未幾復
舉以賑施親鄰中傳之以為美談至其見理明白不惑
邪妄則有人所不能及者初曾祖沒先祖卜葬湖南雅

不信風水之說鄉人有術士耻不售乘間醜為危言冀
夫人惑之而先祖不敢違夫人毅然斥之曰既葬矣庸
何改耶其人慙而退後亦竟無他也夫人生洪武癸丑
十月二十四日卒天順庚辰十月十有六日壽八十有
八明年某月日合葬焉子三人長曰瓊次即先祖諱瑩
厯光祿署丞調福建布政司都事今贈光祿大夫柱國
少傅兼太子太傅禮部尚書武英殿大學士次曰泯女
一人適同邑陳禮廣東左布政使雲鵬之叔父也孫男

十一人浣澤次即先考諱恩累封右春坊右諭德今贈光祿大夫柱國少傅兼太子太傅禮部尚書武英殿大學士次溢滔瀚經綱紀綸繼女四人適汪闕諸誥潘府

胡鏜府今為廣東按察司提學副使曾孫男三十一人
邇次即不肖道遠選贈翰林院編修迅速吏部聽選官
邇逾遠廸兵部武選司員外郎遴巡遠道邇通達遼遲
遇邇迥迂運延近适逸逕過邑庠生女四人適宋闕李
潮韓煉徐賜玄孫男女未可數計茲不贅列竊惟曾祖

考妣積德累仁以遺休于後先祖初官光祿有貤封之
典而竟不遂抱恨終天遷今仰藉餘蔭幸獲追贈三代
庶可伸先祖之志稽諸典禮謂當立碑墓道乃不自量
敢以干執事倘蒙不鄙俯賜一言則光被泉壤感激當
何如也抑曾祖考妣平生善行甚多顧去世已遠遷復
顯蒙無知不能詳述第撫其聞于長者者如此伏惟高
明採擇正德丙寅仲夏穀旦



歸田稿卷二

欽定四庫全書

集部
歸田稿卷三

詳校官中書臣瞿 照

中書臣劉源溥覆勘

總校官進士臣繆 琪

校對官檢討臣李學錦

謄錄監生臣林紹龍

欽定四庫全書

歸田稿卷三

明 謝遷 撰

祭文類

祭吉太守文

惟公宏才偉識蚤遂登庸郡邑之政澤及疲癯一跌弗振終老于窮天乎命乎實係其逢昔在吾郡某方童蒙小試以言受知于公成我之德生我者同圖報未能恒

切于來曩過京口杖履獲從公猶矍鑠笑語雍雍今我
來歸墓木成叢樞衣瞻拜如見儀容陳詞薦酒啜涕臨
風尚享

祭甘拙鄒處士文

惟公世積善良家傳詩禮信義之聲洽于州里嗟予母
黨譜牒是通往返于錫眷愛甚隆予昔銜哀遠煩存弔
公今淪逝曷勝傷悼趨拜墓下聊表予忱公靈不昧庶
其鑒歆尚享

祭外母文

嗚呼壽先五福孰全以生福自天錫誰其允承惟我外
母克享遐齡逾八望九耳聰目明況當晚景家道日興
孝養無違子孫繩繩天祐淑德諸福具并考終以令何
憾幽冥尚茲傷悼半子之情輒車將發祖奠于庭靈其
不昧鑒我微誠尚享

祭八舅文

嗚呼昔我外祖積德深厚慶澤所鍾我母諸舅金玉其章

松柏之茂次第先零惟公獨後公方矍鑠宜享遐壽
曾幾何時而遽顛踣嗚呼哀哉我母視公如足如手母
不可見見舅如母公忽棄背復何云覲彼蒼者天吾將安
咎時序推移新歲易舊音容如在敬奠卮酒悠悠我哀
公其知否尚享

再祭八舅文

嗚呼吾舅傾逝方切痛悲日月易邁奄及周期宅兆既
下窀穸攸宜敬奠一觴奉送靈輶天地茫茫永訣于茲

瞻望勿及涕淚交頤嗚呼哀哉尚享

祭滑安人文

同年宗元
太守之配

嗚呼櫻寧世澤久而不替篤生聞孫亦有賢配太郡撫
摩式助于內歸老鄉邦白首相對宜壽而康遐齡未艾
云胡一疾遽茲長逝某忝托年家聞訃興喟靈輶載途
敬陳一醑尚享

祭陳周常文

嗚呼昔在芹泮同遊有年暨登朝著復相後先匪直交

期婚媾且連悠悠晚景擬共林泉胡我來歸公忽棄捐
感今懷昔涕淚潛然敬陳薄奠表我微虔尚享

祭十叔祖文

嗚呼吾謝族姓數千百指領袖宗門如公者幾博古通
今敦德秉禮信睦之行孚于州里義方之訓施及孫子
粵有嘉名汝濱居士德與年俱後生仰止某于諸孫夙
蒙佑啓教之誨之載提其耳歲在乙未乃初筮仕挈我
妻孥至于京邸跋涉風濤歷數千里勗之官箴晨夕疊

齎奉以周旋罔敢或替隙駒易流倏忽三紀幸獲歸休
日侍杖履公猶強健私心竊喜維天相吉宜錫遐祉眉
壽無疆副我瞻倚云胡一疾溘焉弗起寔有期拜奠
靈几丹旒曷歸湖南山趾顧我先塋相望伊邇哀思倍
增有淚如雨尚享

祭五叔文

嗚呼昔我先考生寡兄弟孑孑孑立辛苦百倍叔惟同
堂情猶一氣動輒相隨終始不二昊天降割先考遐棄

夫何奄忽叔又傾逝家門不幸言何可既敬奠一觴寫
我哀思尚享

祭十八叔處士文

嗚呼昔我先考羣從實繁濟濟一堂惟叔最少次第凋
喪存焉無幾叔年未艾又忽傾逝家門不幸痛如之何
日月易流幽明永隔臨棺一奠用寫我哀尚享

祭馮太恭人文

佩之憲
副之母

惟靈天賦淑質諸德既備天錫遐祉百福咸萃毓秀成

賢遠近瞻企祿養善養終始不異壽迫期頤倏然長逝
在昔罕儔今豈有二某于令子忝托交契載拜登堂夙
欽慈懿靈輒將發奉觴一酌尚享

祭毛太恭人文

世章憲
副之母

惟靈蚤以淑德克配俊英專門之禮科甲成名中道淪
沒乃顯幽貞柏舟自誓玉潔冰清教成令子式繼家聲
內省外臬執法明刑錄養既富薦沐褒榮曾孫滿前蘭
桂斯馨壽躋大耄動止康寧考終以令厚積之徵某夙

蒙眷愛遂締姻盟實惟尊庇施及後生聞訃傷悼什倍
恒情輒車載道薄奠表誠尚享

祭太僕鄒公文

惟公精勤之學既發其身堅強之操不挫于人蹇蹇宦
途屢躓而起勇退急流保終如始繼志有子林壑優游
胡為厭世奄忽仙遊某自弱齡過蒙眷愛今茲歸休幸
接佳會天不慙遺遽失儀型臨歧祖奠涕淚交零尚享

祭六叔處士文

嗚呼吾家伯叔彬彬濟濟天降喪割存者無幾惟叔強
健謂宜遐祉何期一疾而又弗起叔之存日親愛莫比
念我顧我朝夕疊疊遽茲永隔哀痛曷已祖奠一觴靈
其歆止尚享

祭毛太淑人文

應魁
之母

嗚呼忠襄大節光焰汗青內助惟賢自昔著稱桓桓大
叅克紹家聲實亦慈訓于今可徵天道不爽佑于冥冥
褒封祿養壽且百齡倏然長逝全福完名某托交令子

復忝姻盟靈輒將發薄奠表誠尚享

祭陳氏姪女文

嗚呼吾弟蚤逝僅存汝息時方週期呱呱在側汝生不
辰乃至此極念汝孤乳孰不隱惻幸而長成克肖父德
于歸有家婦道不忒男女成行式維宗祏視汝咸宜吾
心稍釋所期永年壽第一脉彼蒼者天胡奪之亟日月
如流寒暑再易佳城既卜幽宮是即遣汝弟兄送汝窀
穸茫茫泉壤遂成永隔倚門遙望老淚沾臆嗚呼哀哉

嗚呼痛哉尚享

祭潘親母文

嗚呼昔我先考托交良人吾弟襁褓遂結姻親中雖不幸親愛益篤某遊泮宮深蒙館穀銘佩厚德萬一莫酬歲月荏苒已及歸休再拜登堂慈顏喜見年雖耄耋步履強健夫何奄忽遽聞訃音感念疇昔傷切我心厚賻則宜無駭可脫敬奠一觴涕零嗚咽尚享

祭華封官文

商器大
參之父

惟靈蚤承家學名著鄉邦慶鍾令子教擅義方甲科高第烏臺未央祿養褒封茂膺晚福宜臻耄耋胡遽仙遊積善餘慶為後遺留某托契姻連傷悼不已靈輒將發薦此微禮尚享

祭七叔文

嗚呼我叔稟性最良聲利不營陶然醉鄉諸子林立教以義方幹蠱有托家道日昌未及中壽胡遽淪亡家門不幸實切痛傷寃宥有期先隴之旁敬陳祖奠涕淚沾

裳尚享

祭毛親母文

嗚呼昔在秋官蜚英郎署家政聿修實維內助秋官蚤
世有子若孫森然成立慈訓具存婦道母儀鄉閭欽企
宜膺晚福胡遽淪棄衆皆傷悼況託姻盟敬陳薄奠用
表哀情尚享

祭邵母恭人文

嗚呼昔方伯公敬事我祖恭人擇配一言而許偉哉憲

副不負所期冰玉輝映室家咸宜憲副蚤休安于澹素
志操不渝亦惟內助善人天祐宜享平康未及下壽胡
遽云亡顧予姻家實兼舊誼松蘿失依悼傷曷既屬茲
衰疾執紼莫從陳詞遣奠聊表哀衷尚享

祭魁一兄處士文

嗚呼吾宗昆弟無慮千指疏通易直如兄者幾解紛導
和為衆所倚善者好之洽于鄉里宜臻耄耋享有遐祉
胡天不憖遽止于此宗門衰薄哀何能已臨棺一奠有

淚如此尚享

祭劉太夫人文

應乾大尹之配
仁仲宗伯之母

嗚呼花封惠政庶幾卓魯去後見思稱賢內助明庭禮
樂接武夔龍成德曷由慈訓之功載錫褒章厚綏祿養
積善在躬百祥天降壽臻耄耄諸福俱全溘焉仙逝亦
何憾焉某受知良人托契賢子遙聞訃音傷悼不已瞻
望西蜀執紼莫從緘辭寄奠聊表哀衷尚享

祭十一叔文

嗚呼先考羣從藹然一堂次第凋落惟叔壽康天胡降
割又忽淪亡門祚衰薄實切痛傷宅兆既卜爰歸其藏
奉送靈輶奠以壺漿念叔平生以醉為鄉冥漠有知更盡
一觴尚享

祭妻兄華處士文

嗚呼太樸既散民風日漓以智以力相詐相欺今人古
風于兄見之自少至老無競無為人皆如兄官法奚施
天道福善耄耄則宜詎意兄壽而止于斯傷悼之情匪

直予私敬奠一觴奉送靈輅瞻望許塘泣涕漣濡尚享
祭蔡親家太守文

嗚呼與公交遊粵自韋布辱締姻盟奄及衰暮新親舊
知慰我心懷向在杜門久曠承晤曩嬰賤恙重煩枉顧
握手論心歡如平素玩水登山公猶健步別幾何時遽
聞公訃嗚呼哀哉惟公盛德衆所向慕傷悼之情又況
親故轉盼幽明倏更歲序遣男代拜一觴聊具瞻望靈
幃有淚如注尚享

祭妹夫韓日成洎亡妹大娘子文

嗚呼日成勤于幹蠱以夜為晝知其有家罔恤厥躬吾妹之賢克相于內勛勞萬狀協力同心家道日隆甲于鄉邑克家之稱人無間言天而假年駸駸未艾胡遽降割相繼淪亡千年強計一旦淅泯嗚呼哀哉襁褓之兒孤嫠之婦魚之肉之將無不可扶植之念實切予懷室爾遠而徒深惻愴日成平素篤于親親周恤保愛不遺餘力無德不報在理則然君子忍之天其昭鑒予何為

哉言亦贅矣日月易邁歲序忽改宅兆安厝尚未有期
行路咨嗟冥漠知否薄陳一奠聊寫予懷尚享

日成與亡妹勤苦成家厚于骨肉撫二孤侄真如已
子待其妹及諸甥尤厚羅氏之富大半日成為之日
成沒遺孤在襁褓其妹與夫及其甥生員羅瑞七輩
肆為侵漁畧無顧復之念其二侄亦然嗚呼人之不
仁一至此哉予無所泄其哀憤也故為文以祭之

祭孫德成都憲文

嗚呼人孰無死死得其所雖死猶生也若吾德成之死
可為得其所矣為國捐軀素志堅定從容慷慨白刃如
飴生氣凜然與嚴霜烈日爭耀嗚呼孤忠全節如吾德
成者古今幾何人哉天地之正氣于是乎在祖宗烈聖
以來作士之效于斯見之豈直吾一鄉一邑之光而已
哉聖明在上公論在大廷褒恤之典不日天降必有以
慰九原之靈者區區衰耄之言何足為輕重哉顧惟夙
昔相許不負所期激烈感慨之懷悲哀痛悼之意自有

不能已者尚歆鑒之

祭同年佟大叅文

嗚呼同年之情異姓骨肉公守吾郡相愛尤篤惟公抗
直困于煩言驥足未展僅叅一藩閩山遥遥素稱瘴癘
旌旆南馳中道而逝公在仕途屈抑已多載罹酷罰天
其謂何憶昨京師握手言別詎謂匆匆遂成永訣過淮
聞訃痛悼不勝臨棺一奠涕淚交橫尚享

祭劉仁仲太宰文

嗚呼天祐斯民為國生賢惟才與德亦罕具全德稱其
才見于東川質由天賦學自家傳精專三禮淹貫羣編
恂恂退抑似不能言其中朗耀如珠在淵妙齡發解唾
手魁元明廷三策大對莫先爰擢史職旋躋講筵德業
日富令聞日宣乃陟卿曹乃司代言不激不隨無黨無
偏柄用之望衆口同然聖明嗣統側席虛前登崇俊良
茅拔茹連胡不慙遺而館遽捐孰屯其膏不及黎元奈
之何哉彼蒼者天既厚其賦乃嗇其年嗟余衰耄久已

歸田江湖睽遠顧念勤惓長箋短札誼重意虔遊從之
好終始弗諼詎謂奄忽遂隔九原瞻望巴蜀心旌徒懸
緘辭寄奠有淚如泉尚享

再祭妹夫韓日成洎亡妹大娘子文

嗚呼吾妹云亡方切痛悲曾未旬月日成繼之昊天降
割乃酷如斯哀哀門戶玆玆孤嫠雙殯在堂奄越三期
平生勤苦亦復何為今聞安厝實慰我思歲聿云暮凜
冽侵肌欲從執紼棄病莫支預陳一奠奉送靈輶瞻望

弗及老淚雙垂尚享

祭蔡茂成憲副親家文

嗚呼人美二難曰兄與弟學貴家傳曰詩與禮孰兼得之吾鄉蔡氏仲禮伯詩後先振起青雲甲第聯芳具美追隨歎歷紆金曳紫勇退急流同歸故里錦衣晝遊光焰桑梓怡怡一堂宜享遐祉夫何奄忽相繼云逝某夙忝交遊姻盟再締葭玉失依傷悼曷已祖奠一觴聊表微意尚享

祭姻家蔡孺人周氏文

嗚呼家道興替實由內助慶鍾善門淑質天賦良人隱
德安于韋布儉勤相成不愆于度義方教子識達時務
克紹家聲旋登仕路祿養有期年未衰暮夫何一疾遽
聞哀訃傷悼同情況在親故宅兆既卜靈輶卽路遣奠
一觴聊表哀悰尚享

祭王龍山文

惟公篤志力學省魁殿元列職詞苑執經講筵旋司邦

禮峻陟天官勇退急流優游故園乃有賢子繼志非凡
奇勲驟建懋賞世延貂蟬赫奕寵賜駢蕃天胡不慙公
逝溘先某鄉曲宦途與公周旋迄于歸老復締姻聯悼
傷之懷其何可言執紼莫從心旌徒懸遣男致奠涕淚
潜然尚享

祭思齋兄文

嗚呼先民有言兄弟孔懷世降俗漓動致喧阗嗟我與
兄少小相隨出入起居秩然和諧迄今白首片言無乖

我官京師兄處海涯相望相念日往月來我方歸老兄
尚未衰邱園行樂幸與兄偕兄先棄我嗚呼痛哉時序
易邁奄及塋埋遣奠一觴聊寫我哀臨風號慟老淚盈
腮尚享

祭八舅母文

惟我舅母夙昔稱賢儉勤慈惠終老弗諼積善在躬福
祐自天壽躋大耄子孫滿前考終以令百福具全痛惟
我母棄背溘先我見舅母如見母顏今亦已矣哀何可

言奉奠一觴有淚如泉尚享

祭親家王方伯文

惟公官至方伯位既崇矣人猶以為未究厥施壽躋古
稀福亦隆矣人猶以為未及期頤公之素望允孚于人
者于是乎槩可知矣蓋棺事定是曰全歸而况森然蘭
玉接武青雲又不卜而可期矣復何憾哉輜車將發遣
兒一奠用寫哀情此固吾親友之私耳尚享

祭馮雪湖親家文

嗚呼世降不古朋友道喪久要不忘幾何人哉惟我與
公夙惇道誼自壯至老曾無間然晚締姻盟愛好彌篤
胡天不慙溘焉棄予俛仰之間遽成永隔湖山行樂誰
復與俱嗚呼哀哉惟公達生宅兆預卜歲聿云暮言歸
其藏奉送靈輶敬陳一奠悲傷之極言不成章公靈不
昧其知之乎尚享

祭王守谿文

嗚呼惟名與節是謂大閑名節之難全也久矣士君子

行藏進退始終無玷缺者古今幾何人哉惟吾守谿蚤
冠賢科文名籍甚晚躋台輔德望益隆及夫時與志違
即引身求退優游桑梓全而歸之嗚呼若公者庶幾其
無餘憾矣乎某自蚤歲獲從公後心孚意契終老不渝
密勿之地謬先忝竊蓋嘗慕推讓之義而不獲同升歸
休之日相望伊邇亦嘗有會老之約而未償宿願夫何
奄忽遽聞訃音追念平生可勝痛悼茲聞靈輅將駕執
紼莫從瞻望吳門惟含淚嗚咽而已緘詞致奠聊寫我

哀靈其鑒之尚享

祭洪兩峯文

惟公宏才偉畧超拔時英甲科高第列職明刑中外敷
歷臺省兼并望重縉紳曰維邦禎正德之初羣盜縱橫
乃膺簡命四省提兵姦宄矯虔漸次殄平媚嫉當途讒
謗蜚興公即見幾抗疏辭榮湖山佳勝鄉社良朋盤桓
笑傲強健康寧輿論攸屬國有老成謂當復起以弼明
廷胡天不憖溘焉上征某自蚤歲忝同科名意氣相與

異姓弟兄宦路周旋載締姻盟天緣弗竟眷愛彌增奄
忽棄予痛悼曷勝奔赴則宜衰病未能江關渺渺徒切
馳情當寧聞訃念昔股肱恤典優渥將卽佳城執紼之
役遣兒代行陳詞致奠寫我平生瞻望兩峯涕淚交零
尚享

祭楚母大孺人文

惟靈夙全懿德表則閨門慶鍾令子致身青雲循良之
政惠我邑民潘輿就養閭井歡欣云胡一疾奄忽沉淪

百里何怙哀動縉紳顧余衰耄病卧海濱靈輅將駕瞻
望徒勤遣兒執紼薄奠聊陳尚享

祭韓上舍文

嗚呼安陽流澤施及雲仍司冠清德再振家聲偉哉猶
子蘭茁其英胄監蔭叙寵命是承允期驥足奮迅雲程
胡為中道一蹶而傾嗟我幼子方締姻盟葭玉失依傷
悼曷勝茲聞靈柩將即佳城祖奠一觴聊表哀情尚享

祭胡母黃太淑人文

嗚呼家道之興實由婦德維太淑人閨閫之則篤生賢
子天賦穎特文苑蜚英賢科發跡宦路翱翔士林矜式
祿養豐腴褒封烜赫慈訓足徵善慶是積壽考令終福
履不忒鄉黨姻親猶切悼惜茲聞靈輿將歸窀穸敬奠
一觴庶其昭格尚享

祭姑夫太常少卿南山藩公洎家姑恭人文

昔我先祖慎于擇壻東床之選得之途次公時垂髫頭
角穎異立談之頃姻盟遂締公承我祖式克自勵我姑

于歸儉勤相濟積學成名甲科高第中外敷歷學優而
仕臬司提學實惟重寄廣右大藩稱善作士親老乞休
心切養志林壑優游學力益肆著述專攻屢空弗計名
動縉紳薦剡相繼太常清銜寵命薦至壽躋古稀我姑
先逝曾幾何時公復奄棄當宁褒賢錫以諭祭兼命有
司助營塋事即公平生可以無愧嗟我與公夙惇契誼
少小相親老而不替公今全歸卜吉得地我方衰病名
命忽至執紼莫從徒切馳繫遣兒致奠不勝涕淚尚享

祭應天府尹陳公文

公剛勁之氣足以振風紀廉潔之操足以勵貪墨明敏
果斷之識又足以辨曲直而明是非是故來長吾浙憲
也未及一載而聲聞四達已徹于九重遂有京尹之擢
縉紳之徒孰不以公道昭明賢俊超拔為慶幸也夫何
寵命甫臨忽遘危疾竟以不起矣可勝悼哉嗟予衰耄
病卧海濱辱公以吾子同年之雅顧念勤惓予方期公
大用詎謂遽止于斯耶然予之所以悼公者又非通家

之私情而已也靈輅將駕遣奠一觴英靈不昧其鑒于
衷尚享

祭晦菴老先生文

劉健字希賢號晦菴河南洛陽人也

嗚呼敬皇御極時稱盛治至仁如天覆冒斯世公居元
寮明良相際謹論嘉謨直節勁氣誠意交孚委任無貳
其忝從公後協力同志素性迂愚言多率易荷公優容曾
不為異濫厠密勿苟免罪戾榻前末命同受重寄龍馭
上賓權奸恣肆守正不同橫罹讒忌我時從公引身退

避都門一別江湖兩地轉盼光陰二十餘稔緬想風儀
每形夢寐我今北上公已長逝悠悠河洛徒切瞻企絃
詞寄奠臨風噉涕尚享

祭姑胡太儒人文

昔我先考生寡兄弟曰維二姑是為同氣天降酷罰大
姑先逝未及再期姑復相繼嗚呼哀哉姑蚤孀居栢舟
自誓撫孤成立幸躋祿仕闕析雖微亦足養志迎養未
幾胡遽奄棄某欽奉召命道經徐沛瞻望夾溝曷勝馳

繫嚴程有期不遑留滯寄奠一觴潛然涕淚尚享

祭西涯先生文

惟公海內文宗詞林人傑嗟我晚生幸從後列荷公接
引不鄙疎拙紫閣同升屢更歲月敬皇殊遇我慚淺劣
同寅協恭不為容悅榻前顧托相期盡節龍馭上賓儉
邪作孽于時乞身草草言別詎謂與公遂成永訣自我
告歸茫茫燕越公嘗念之音問不絕聖明嗣統邪黨熄
滅我已衰頽因臥巖穴召命下臨勉強赴闕公不可見

金匱要略卷之三
卷三
徒勞企渴公墓在茲敬來瞻謁宿草已荒含淚嗚咽公靈
不昧鑒我虔切尚享

祭九叔處士文

嗚呼昔我先考羣從如雲次第零落惟叔僅存我歸自
京叔已臥病猶及一見動色相慶曾未旬日叔遽云亡
家門凶禍曷勝痛傷日月不居遂將安厝祖奠一觴老
淚如注嗚呼痛哉尚享

祭諸戶侯文

惟公交我先君情若同氣朝夕往來終始無替先君不
幸公亦長逝我今號號傷痛曷既靈柩在堂奄忽更歲
謹具薄羞遣男一祭尚享

祭陳南坡文

嗚呼昔我姪女賦質柔嘉獲配君子宜室宜家姪女不
幸中道奄棄姻親之情終始弗替天胡降割又奪南坡
念及姪女傷如之何窀穸有期靈輅將舉遣奠一觴老
淚如雨尚享

祭王陽明文

嗚呼陽明而止于斯乎天生異才非偶然也固將以為
植于國胡為嗇其年而不使之究厥施乎夫名高毀來
自古已然陽明不理于多口亦甚矣豈平素之所自立
母乃太奇矣乎然戡定亂逆之勲表表在人耳目者九
重固深知之矣又安得泯遺于鼎彝乎吾之所以悼陽
明者為國惜才故爾豈直區區交親之私乎嗚呼陽明
九原茫茫其亦知予之悲乎尚享

祭趙古愚老先生文

夫人生有聞于當時死有傳于後世是亦足矣而亦何
悲惟公清資矯矯勁節危危忠孝之夙植識望之高遠
而輔以學術之精微頃以天潢首擢閩魁雲衢既奮
蜚聲郎署分校禮闈幸歐裁之是協匪左右之為媒感
受知而旃勉咸頌公之神鑒于不衰陟秋曹而督學乃
輿論之攸推掄才品藝星光日輝指幽摘隱製電轟雷
奸宄凜凜其讐服而學者則翹然仰太山北斗之巍巍

詎昊天弗弔聲聞畿甸魄降番禺雖迤邐踣躓中道摧
車視彼富貴壽考待生而存隨死而亡者果孰昂而孰
低嗚呼公其已矣而不泯者有積慶之表與斥弘範之
詩庶乎英風靈氣不同物而腐敗長在乎宇宙之間為
後學之依歸遷也悵哲人之云萎能不為之泣涕而躑
躑嗚呼公既有文為不朽有名為不死而臨風遙企不
能忘情者蓋為斯文慟而豈以哭吾私

歸田稿卷三